

«Uss èsi simplamain be dad ir per giasts»

Grischun Vacanzas: Radunanza generala

DA GION NUTEGN STGIER / ANR

■ **Reelecziun onuravla per Marcel Friberg sco president da l'organisaziun turistica grischuna. Per carmalar daplis giasts en il Grischun vul quella rinforzar la fiera en Svizra. Turissem, politica ed economia hajan ussa da reagir cuminaivel per ch'il Grischun perdia betg anc dapli pernottaziuns.**

A Cuira ha gi lieu la radunanza generala da Grischun Vacanzas e quai èn preschientscha da blera prominenz politica e da l'economia. En ses pled d'introducziun ha ditg *Marcel Friberg*, il president da Grischun Vacanzas, che la situaziun dal turissem saja da preschent alarmanta. Dapi il 2009 perda noss chantun successivamain pernottaziuns e quai saja tut auter che plaschaivel. Il Grischun haja 700 hotels cun 46 000 letgs ed uschia in potenzial per 18 000 pernottaziuns. La realitad saja dentant quella ch'il 2014 haja la hotellaria grischuna fatg tschintg milliuns pernottaziuns. Il 2008 eran quai anc 6,2 milliuns pernottaziuns, uschia che en sis onns sajan las pernottaziuns sa reducidas per 24%. Damain pernottaziuns, damain entradas per hotels e gastronomia, damain entradas da taglia per las vischnancas e per l'entira economia, quai saja da preschent la realitad.

Betg stà conscient da tut quai che vegn encunter

Al timun da l'organisaziun turistica Grischun Vacanzas è Marcel Friberg dapi il 2012 e venderdi passà han ils delegads e las delegadas reelegi l'um da Breil en quel uffizi. Cun far ina bilantscha dals ultims trais onns manegia Marcel Friberg ch'el saja propi betg stà conscient da tut quai che vegnia encunter cun surpigliar quel pensum. Succedidas sajan ina rotscha chaussas negativas per il turissem sco per exempel il NA a la taxa turistica unificgada ed il NA als Gieus olimpics d'enviern 2022 en il Grischun. La votaziun dals



Clers plets da Marcel Friberg (san.), il president da Grischun Vacanzas, e da Gaudenz Thoma, il directur da l'organisaziun turistica, venderdi passà tar la radunanza generala a Cuira.

FOTO G. N. STGIER

emigrants, quella da las abitaziuns secundaras ed ussa dapi il schaner la situaziun da l'euro, quai sajan tut chaussas a dischavantatg dal turissem. Quai che haja er fatg surstar el saja che tar il turissem grischun n'eria betg avant maun ina tscherta concordanza co ir enturn cun il turissem tar ils exponents. «Jau hai plaschair che en quella chaussa essan nus oz in pass pli enavant», punctuescha Marcel Friberg. Las structurass sajan uss avant maun e la lavur da basa saja er fatga, uschia che ussa saja simplamain dad ir per giasts e metter il focus sin quel pensum, manegia il president da Grischun Vacanzas. En l'avegnir saja er da tgrir pli bain ils possessurs da las abitaziuns secundaras,

tschertgar il contact cun quels e porscher en pliras modas maun a quels giasts fidai-vels.

Betg negligir ils auters giasts

Ina gronda part da la campagna da marketing da Grischun Vacanzas prevesa da rinforzar la fiera en Svizra e da persvader ils Svizzers da far lur vacanzas en il Grischun. «Quai è segir ina gronda sfida ed incumbensa, dentant dastgain nus betg negligir las autras fieras, ditg concret ils giasts tudestgs, ollandais, englais ed er anc auters», accentuescha Marcel Friberg. Cun ils pretschs che nus avajan en il Grischun ed er en Svizra saja quai dentant insumma betg uschè simpel. Ultra da quai

prendia la politica decisiuns ubain er betg e quai en dischavantatg dal turissem. Il cas saja quai stà l'emna passada cun la decisiun dal cussegl nazional d'abolir l'import da products da l'exteriur, uschia che nossa gastronomia sappia strusch star a pèr cun ils pretschs da la concorrenza en l'Austria ed en il Tirol dal sid. Nus essan cuntents che la regenza ha a curta vista decidì da dar a Grischun Vacanzas in mez milliun francs per ir sin la fiera en Svizra, ha menziunà Marcel Friberg. Ventirai-vel è el lura er che las destinaziuns sustegnan quella acziun cun 600 000 francs. Decisiva saja magari betg la summa, mabain quai che vegnia fatg cun quella, manegia il Sursilvan. «Ussa faschain nus per exem-

pel cun ina part da quels daners er ina brochura sco quai che er autras destinaziuns en Svizra ed en l'exteriur fan», ha ditg Marcel Friberg. El saja er persvas che quella acziun portia fitg bler.

Damain dis en il Grischun

Ina raschun ch'il dumber da las pernottaziuns saja sa reduci ferm ils davos onns saja che cunzunt ils giasts da la Germania restian be per paucs dis en in hotel e betg sco anc avant intgins onns in'emna ubain 14 dis, conferma *Gaudenz Thoma*, il directur da Grischun Vacanzas. La situaziun da l'euro e dal ferm franc svizzer saja en vair senn ina catastrofa, manegia il directur. «Da curt sun jau stà a Hannover tar l'interpresa da viadis Tui e vesì che da preschent è be il pretsch il cumponent principal per vegnir tar daplis giasts», ha ditg Gaudenz Thoma. Grischun Vacanzas saja adina a la tschertga da giasts che sajan betg be prontos da discurren sur dal pretsch, mabain er da la purschida e cunzunt da la qualitat. «En la massa avain nus davairas tut auter che simpel da vegnir tar giasts cun esser la concorrenza simplamain pi favuravla», accentuescha Gaudenz Thoma. Gist il giast tudestg, quel cumpareglia ils pretschs e quai co, dentant che la qualitat saja betg uschè da gronda impurtanza. Paradox saja bain che ils giasts che fetschian vacanzas en il Grischun sajan tuts cuntents, manegia il directur da Grischun Vacanzas. «La vaira qualitat sa resulta be tar ina crisa sco ch'il turissem grischun haja da preschent e sche nus fissan uschè nauschs sco quai che bliers fetschian parair, lura avessan tuts anc blier dapli damain giasts», punctuescha Gaudenz Thoma. Far schlet il turissem svizzer, la gastronomia e la hotellaria, quai saja en Svizra in vair «sport», manegia il directur da Grischun Vacanzas. El manegia er che en singuls lieus turistics saja bain betg tut perfetg, dentant da pauschalisar l'entir turissem sco nausch, quai saja propi malgist.